

दिनांक 21.03.2025

समय: 18.45 बजे

- देश रा गांवाई हलकां मांय जल जीवन मिशन रा तैत हाल ताई 15 करोड़ 52 लाख ऊं बत्ता पिरवारां कने नळ रे जरिये पाणी पूगायी ज्यो।
- अंतर्राष्ट्रीय वन दिवस रे मौके प्रदेशभर मांय कार्यक्रम राख्यी ज्या-राज्य स्तर रा जळसा मांय मुख्यमंत्री भजनलाल शर्मा कह्यो- हर रेहवासी ने कुदरत ने बचावण रा काम री जिम्मेदारी लेवणी चाहिजे।
- राज्यपाल हरिभाऊ बागडे नौजवानां ऊं बगत ने पूरो काम लेवण अर लक्ष्य रा प्रति समर्पण भाव राखण बाबत कह्यो।
- प्रदेश मांय आज सीळा सातां रीत मुजब मनायी जा रही है-केई ठोडां मेळा भर रह्या है।

000

देश रा गांवाई हलकां मांय जल जीवन मिशन रा तहत हाल ताई 15 करोड़ 52 लाख ऊं बत्ता पिरवारां ने नळ रे जरिए पाणी मुहैया करायी ज्यो है। जलशक्ति मंत्री सी.आर. पाटिल लोकसभा मांय जलशक्ति मंत्रालय ऊं जुड़ी अनुदान मांगां माथे व्ही चर्चा रो जवाब देता थकां आ जाणकारी दीनी। वे कह्यो के मिशन री सुरुआत रा साल 2019 मांय देश रा गांवाई हलकां मांय महज तीन करोड़ पिरवारां कने नळ रे जरिए पाणी पूगावण रा कनेक्शन हा। श्री पाटिल बतायो के मौजूदा केंद्र सरकार लारला यूपीए राज री तुलना मांय पीवण रा पाणी अर इण ऊं जुड़्या हलकां सारु बजट मांय चार गुणी बधोतरी कीनी।

000

गृह मंत्री अमित शाह कह्यो है के केंद्र री नरेन्द्र मोदी सरकार री आतंकवाद ने बिल्कुल बर्दाश्त नी करण री नीति है। वे आज राज्यसभा मांय गृह मंत्रालय रा कामकाज रा बारा मांय व्ही चर्चा रो जवाब देता थकां आ जाणकारी दीनी। श्री शाह कह्यो के एन.डी.ए. रा राज मांय जम्मू-कश्मीर मांय आतंकवाद रे कारण व्हेवण वाळी मौतां री तादाद मांय 70 फीसदी री कमी आयी है अर आतंकी वारदातां मांय ई भारी कमी आयी है। श्री शाह कह्यो के उड़ी अर पुलवामा मांय व्हा आतंकी हमलां रा दस दिन मांय भारत पाकिस्तान रे खिलाफ सर्जिकल अर एयर स्ट्राइक कीनी ही।

000

आज अंतर्राष्ट्रीय वन दिवस मनायो जा रह्यो है। इण रो ई साल रो मुद्दो **“वन और भोजन”** जंगलात हलकां अर दुनिया मांय भोजन ऊं जुड़ी हिफाजत बीचे खास रिश्ता माथे जोर देवे है। वन दिवस रे मौके प्रदेश मांय ई न्यारा-न्यारा कार्यक्रम राख्यी ज्या। जयपुर मांय राख्यी ज्या राज्य स्तर रा जळसा मांय मुख्यमंत्री भजनलाल शर्मा, वन मंत्री संजय शर्मा, जनता रा नुमाइन्दा अर न्यारा-न्यारा अहलकार मौजूद हा। कार्यक्रम मांय मुख्यमंत्री कह्यो के कुदरत म्हाणी जिन्दगी री बुनियाद है, ई कारण वां ने बचावण सारु हर रेहवासी ने जिम्मेदारी समझणी चाहिजे। वे कह्यो के म्हाणी संस्कृति मांय रूखड़ा अर पहाड़ां री पूजा करी जावे है अर राजस्थान रो कुदरत ने बचावण सागे जूनो नातो है।

वे जनता ऊं जंगलात हलका अर जैव-विविधता ने बचावण अर वां ने बधावण सागे आवती पीढ़ियां सारु हर्यो भर्यो अर स्वस्थ राजस्थान बणावण री अपील कीनी।

मुख्यमंत्री कह्यो के मिशन हरियाळो राजस्थान रा तैत 50 करोड़ पौधा रोपणो तैय करी ज्यो है अर इण रा तैत चालू माली साल मांय सात करोड़ पौधा रोपी ज्या है। कार्यक्रम रे दौरान मुख्यमंत्री वन प्रशिक्षण और प्रबंध संस्थान री नींव रखी। वे प्रतापगढ़ कने सीतामाता वन्यजीव अभ्यारण्य मांय इको टूरिज्म ऊं जुड़्या सुबीता अर भरतपुर अर जयपुर कने नाहरगढ़ बायोजिकल पार्क मांय इलेक्ट्रॉनिक गोल्फ कार्ट जनता ने सूप्या। मुख्यमंत्री वन विभाग री ओर ऊं बणायी ज्या एप-**डीजी वन** री सुरुआत ई कीनी, जो देश रो पहलो डिजिटल फोरेस्ट स्टेक है। ब मुख्यमंत्री ई मौके पौधा ई रोप्या। वन अर पर्यावरण राज्य मंत्री संजय शर्मा ई कार्यक्रम मांय विचार बताया।

सामाजिक न्याय अर अधिकारिता विभाग रा दिव्यांगजन सशक्तिकरण विभाग री ओर ऊं आज उदयपुर मांय राष्ट्रीय देव कला मेळा री सरुआत करीजी। 10 दिन रा ई मेळा रो उद्घाटन राज्यपाल हरिभाऊ बागडे अर केंद्रीय सामाजिक न्याय अर अधिकारिता राज्य मंत्री रामदास अठावले कीनो। मेळा मांय 20 राज्यां अर केंद्र रा राज वाळा प्रदेशां ऊं 100 ऊं बत्ता दिव्यांग कारोबारी अर कलाकार वां रा न्यारा-न्यारा उत्पादां री प्रदर्शनी लगा र बिक्री करेला। मेळा रे दौरान रोजीना दिव्यांग कलाकार सांस्कृतिक कार्यक्रम ई पेश करेला अर वां कानी ऊं बणायी ज्या व्यंजनां री दुकानां ई लगायी जावेला।

उपमुख्यमंत्री अर पर्यटन मंत्री दिया कुमारी 30 मार्च ने मनाया जावण वाळा राजस्थान दिवस री तैयारियां रो जायजो लेवण सारु आज जयपुर मांय अहलकारां सागे मीटिंग कीनी। वे अहलकारां ऊं सगळा ज़रूरी इंतजामात् करण रा हुकम दीना। उपमुख्यमंत्री सैलाणियां रा सुबीता सारु बेगो ई ऑनलाइन ऐप बणावण बाबत् कह्यो। दिया कुमारी जयपुर रा गोविन्द देव जी मिन्दर ने और रूपाळो बणावण रा मकसद ऊं ज़रूरी कामां रो जायजो लेवण बाबत मन्दिर परिसर अर आरे-सारे रा हलकां रो दौरा कीनो।

राज्यपाल अर विश्वविद्यालयां रा कुलाधिपति हरिभाऊ बागडे नौजवानां ने समय ने पूरा काम लेवण अर लक्ष्य रा प्रति समर्पण भाव राखण बाबत् कह्यो है। वे आज जोधपुर मांय जय नारायण व्यास विश्वविद्यालय रा दीक्षान्त समारोह मांय बोल रह्या हा। श्री बागडे नौजवानां ऊं सम्पन्न भारत बणावण बाबत् पूरा मन ऊं काम करण सारु कह्यो।

केंद्रीय संस्कृति अर पर्यटन मंत्री गजेंद्र सिंह शेखावत ई दीक्षांत समारोह मांय वर्चुअल तरीका ऊं सिरकत करता थकां उपाधि हासिल करण वाळा विद्यार्थियां ने बधाई दीनी। शेखावत कह्यो के किण ई देश ने संस्कृति, भणार्ई-लिखाई अर इतिहास रा हलका मांय मज़बूत बणावण मांय विश्वद्यालयां रो मोटो काम व्हे है। जळसा मांय राज्यपाल 60 विद्यार्थियां ने सोना रा तमगा दे र नवाज़ा। वे 187 जणां ने पीएचडी री उपाधि ई दीनी।

आज विश्व कठपुतली दिवस है। ई मौके मुख्यमंत्री भजनलाल शर्मा सोशल मीडिया रे ज़रिए कह्यो के कठपुतली कला रो समृद्ध इतिहास व्हेवण सागे आ सांस्कृतिक धरोहर रो अभिन्न अंग है। वे जनता ऊं कला री ई अनमोल विरासत ने बचावण अर बधावण मांय योगदान देवण सारु कह्यो।

सवाईमाधोपुर जिला रा सेवन्ती खुर्द री स्कूल मांय **केंद्रीय संचार ब्यूरो** री ओर ऊं आज सरकारी योजनावां ऊं जुड़ी प्रदर्शनी लगायी ज्यी। इण मांय ब्यूरो रा प्रभारी नेमीचंद मीणा केंद्र सरकार री ओर ऊं चलायी जा रही जनता रा भला री न्यारी न्यारी योजनावां री जाणकारी दीनी। कार्यक्रम मांय स्वच्छता रा बारा मांय जाणकारी देता थकां ग्राहकां रा हक अर हितां री हिफाजत रा बारा मांय विगतवार बतायी ज्यो। ई दौरान राख्यी ज्यी प्रश्नोत्तरी होड़ मांय जीतण वाळा ने ईनाम दिया ज्या अर कार्यक्रम मांय मौजूद लोगां ने साफ-सफाई राखण री सौगंध दिरायी ज्यी।

ब्रज हलका रा डीग मांय होळी पाछे अब हुरंगा महोत्सव मणायो जा रह्यो है। होळी पाछे 9 दिन ताई चालण वाळा हुरंगा महोत्सव मांय ब्रज रा हुरियारा अर हुरियारिनां होळी खेले है। म्हाणी खबरनवीस बतायो के सदर बाज़ार रा लक्ष्मण मिन्दर मांय खास कार्यक्रम राख्यी ज्यो।

प्रदेश मांय आज **सीळा साता** रे मौके शीतला माता री पूजा-अर्चना करी जा रही है। ओ पर्व चैत महीना री अंधारी सातम अर आठम ने मनायो जावे है। ई दिन साफ-सफाई अर आरोग्य री देवी शीतला माता री सीळा पकवानां रो भोग लगा र पूजा करी जावे है। ई मौके केई ठोडां मेळा ई भरे है। जयपुर कने चाकसू रा शील डूंगरी शीतला माता मिन्दर मांय संवारे ऊं ई मोटी तादाद मांय जातरू पूगण लाग्या। कोटा मांय टेशन रा शीतला माता मिन्दर मांय ई मोटी तादाद मांय जातरू पूग्या अर माता ने खाण-पीण री सीळी चीजां रो भोग लगायो। पाली मांय ई लुगाइयां शीतला माता रो पूजन कर र बास्योड़ा रो भोग लगा र खुशहाली री कामना कीनी।

बालोतरा जिला रा कनाना गांव मांय सीळा सातां रं मौके सालाना मेळो भर्यो, जिण मांय मोटी तादाद मांय जातरु शीतला माता रा दर्शन कीना। मेळा मांय गेर दल नाच र लोक कला अर संस्कृति री छटा बिखेरी। मेळा मांय धर्म सभा ई राख्यी ज्यी। बाड़मेर जिला रा गुढामालानी मांय भेडाणा री शीतला माता रा मिन्दर मायं ई मेळो भर रह्यो है। राजसमंद जिला रा धोइंदा, राजनगर अर कांकरोली मांय सीळा सातां रे मौके रंगां ऊं होळी खेली ज्यी। भीलवाड़ा मांय ई रीत मुजब रंग-गुलाल खेल र पकवानां रो मजो लियो ज्यो। वटे बरसां ऊं चाल रही रीत रे मुजब जीवित व्यक्ति री शव यात्रा निकाळी ज्यी।

000

अजमेर मांय काल राष्ट्रीय लोक अदालत लगायी जावेला। राजस्व मंडल मांय समझाइश ऊं निपटाया जावण लायक मामलां रा निपटारा सारु मंडल लेवल माथे बैच बणायी ज्यी है। अतिरिक्त निबंधक (न्याय) हेमन्त स्वरूप माथुर बतायो के लोक अदालत रा तैत पक्षकारां बीचे सहमति अर समझाइश रा आधार ऊं बत्ता ऊं बत्ता मामला निपटावण री कोशिश करी जावेला। लोक अदालत लगावण ऊं जुड़ी जरूरी तैयारियां पूरी कर लीरीजी है। ध्यान जोग है के आठ मार्च ने राख्यी जावण वाळी लोक अदालत जरूरी कारणां ऊं टाळ दीरीजी ही।

000